

'Semai kasih sayang dalam diri sendiri'

BA-30/7/2006

BANGI: Datuk Seri Abdullah Ahmad Badawi mahu setiap rakyat Malaysia memupuk kasih sayang dalam diri sendiri supaya menjadi individu penyayang yang mewujudkan keluarga penyayang dan seterusnya masyarakat penyayang.

Berucap merasmikan Sidang Kemuncak Kelab Penyayang 2006 anjuran Yayasan Budi Penyayang, di sini, semalam, Perdana Menteri berkata, insan penyayang sudah tentu menjadi manusia yang adil dan tidak akan melakukan perkara yang menzalimi orang lain.

"Kita kena semai rasa kasih sayang. Kasih sayang adalah segala-galanya. Ia baik untuk diri, keluarga dan masyarakat. Kita kena mula dengan diri kita supaya kita jadi ma-

nusia yang berguna kepada masyarakat," katanya.

Hadir sama ialah Menteri Pengajian Tinggi, Datuk Mustapa Mohamed, Timbalan Menteri Pelajaran, Datuk Noh Omar, Pengerusi Yayasan Budi Penyayang, Nori Abdullah dan Pengerusi Astro, Datuk Badri Masri.

Majlis yang diadakan di Institut Latihan Keselamatan Sosial KWSP (ESSET) di sini itu disiarkan secara langsung menerusi rangkaian Astro Ria.

Mengimbuai kenangan lalu, Abdullah berkata, beliau dan Allahyarham Datin Seri Endon Mahmood banyak mempelajari erti kasih sayang di antara satu sama lain.

"Beliau mengajar saya bagaimana untuk menjadi seorang yang penya-

yang. Beliau adalah wanita penyayang. Beliau tidak akan mengecewakan sesiapa pun. Sebab itulah walaupun beliau tidak sihat, beliau tetap aktif dalam membantu dan menyertai kegiatan sosial," katanya.

Endon adalah pengasas Yayasan Budi Penyayang yang kini dipengerusikan anak perempuan mereka, Nori.

Sehubungan itu, Abdullah mengalu-alukan penubuhan Kelab Penyayang di institusi pengajian tinggi (IPT) tempatan sebagai kegiatan kokurikulum.

Beliau berharap kegiatan kelab itu dapat mewujudkan graduan penyayang yang akan menyumbang bakti kepada masyarakat.

"Apabila ada berasa sayang dalam diri, seseorang itu akan lebih mudah

untuk membantu orang lain atau melakukan kerja sukarela kepada masyarakat," katanya.

Terdahulu, Nori dalam ucapannya, berharap ahli Kelab Penyayang akan sentiasa menghayati objektif dan misi kelab dengan memastikan identiti yang dibina menjadi cahaya yang akan dicontohi ahli organisasi lain.

"Kami berharap dengan pelaksanaan program ini, Yayasan Budi Penyayang dan rakan kongsinya dapat membantu dalam usaha kerajaan menjayakan agenda Wawasan 2020 dan pembinaan modal insan sejajar hasrat Perdana Menteri Malaysia," katanya.

Pada majlis itu, Abdullah turut menyampaikan Anugerah Datin Seri Endon Mahmood dan Biasiswa Astro kepada lapan pelajar.